

“Chalrras del tío Farrucu”

(En fabla extremeña)

por Joaquín CUADRADO PALACIOS



ENOL Diretól del papel: Mi usté, endi jaci tiempu me se enreaba en la mollera el escribili a usté, contándoli cosinas de mi pueblu de García, pa que se enterin esus deslustraos que lein los papelis, pol que lus vaga más que a nusotros los campusinos, que tenemos que «descoñarnus» trabajandu pa que coman pan blancu ellus y toa España, y que no semus ni agracios ni miraus comu los que lo jacin en las frábricas. A vel si ahora, con esu que icin de la demucracia, esi Celipi Gonzali, que tamién pedrica, y los de Suari, son tius echaus pa lanti y son capacs de sulucioná nuestras fartas de jaci muchus años, que ellos conocin mu bien y las galrreaban en los descursus por cuandu las eleccionis, talis comu: la baratura de la via, los mercaus, las endustrias extremeñas en los pueblus pa empleá a la genti, y sobre too, que crein trebajo pa que güervan los paisanus que juyeron a la Alemania, polque aquí no jallaban ná que jacer pa ganalu.

Y, ya sabi usté, con estu de la tele lo ve toa la genti y no pasa ná desapercibiu. Les heinus votau pa que se llevin toos comu güenus hermanus y no se enreen en reñil unus con otrus man que no sean del mismo partiu, polque al fin España es de toos y hay que enderezarla con el esfuerzu y el trebajo de toos y no se puen recordá lo pasau, sino llevalsi comu hermanus pa levantala y jacegla mu rica.

He endilgau unos pocus de renglonis y no me he presentau a usté, comu mandan los cánonis a toa presona bien nacía, polque usté no tieni el gustu de conocelmi, pos yo soy Farrucu, hombre vieju del siglu pasau, de ayel y de hoy, que conocí lo de antis y veu lo de ahora mesmu y que pasé la juventú trabajandu muchu y mu seguiu, arrancandu

matas en estus roblis, estoñandu, escuajandu en la jesa, arandu, segandu, y pasandu muchas fatigas ajogus en la era con los calorís. Y mie usté, las cosas claras: los de antis jablablan muchu en los descursus y ná arreglarun a los probis en aquellu de la Rejorma Agraria, ni Prietu, ni Largu. ni Andaleciu, ni Azaña, ni siquiá Gili Robli. Ician que no poian polque no les ejaban, y no me paeci raru, pos perdian el tiempu en reñil, sentánduse y puniénduse de pie en las poltronas esas ca habian ganau con nuestrus votus. Pol eso ahora mesmu pedimus a Celipi y Suari no mos vaya a pasal igual; que se espabilin y vayan al granu, con tos los deputaus unios, polque mie usté, creu que la demucracia es cosa güena cuandu jaiga repetu de unus pa otrus y no riñas, ni huelgas, ni bombas, ni petardus, ni tantas cosas que el pueblu no quieri. «A la ocasión la pintan calva», que no se la ejin pasal de seguío, no vaya a venil lo peol y nos amolemus toos como antis, pol culpa de las desamenencias. Pol esu no mos gustó al pueblo que Celipi jiciera golgoritus pa folmal el Gobiellnu ayuando a Suari, pa luego jacelu él solu con su partiu sin compromisus ni desgastis, pus España está gravi, como un malu en la cama, y cuantu antis la levantín della mejol pa tos.

Güeno, y ya ejo estu de Madri y le contaré a usté que en los papelis a veniu que a nuestra ilesia la han jechu morumentu nacional y que lo ha moviu don Juan Pablus, el méicu, mu queriu paisanu nuestro, iendu a Madri y alcanzándulo del señó Menistru de la Curtura u lo que sea, que me se enrea la luenga cuantis veu más de cuatro letras en ringli, y que jicierun a su hermanu, don Eciquié, tamién mu queriu, dambus a dos mu listus, Secretariu del Gobiellnu de Cáceris, y que a don Juan Manué, otru paisanu de palanti, le jicierun Retol de esu de los curas, dondi se jacin, mejol dichu, y que el pueblu se pusu mu contentu con dambas noticias, y que estu está repletu de genti ca veniu de juera, pero que son daquí, a pasal el veraneu, pol cieltu que más que veranu más bien paeci invielnu, pos jaci un friu que pela pol las mañanas con el recenciu y pol las nochis, pues creu que cain unas peldas comu en Eneru. Vaya un tiempu tan raru, ca achacan los hombris esus, comu Marianu el de la tele, sí, el Medina, a esu de las tómicas y a lo del airi infestau. Igu yo, que ejen de tiralas y limpien la amófera, no muramus toos ajogaus, arrecius.


Pol aquí trebajo no farta ahora con las suvencionis pal paru: se cementan las calles y se jizu una pircina dondi los muchachus chapolotean en mediu el día y la genti mayol pol las tardis, dondi el ríu La Torri, pero en bañao decentimentí, no comu en las playas, con esas braguinas y sujetaoris, del bikini, que veu pol la tele a vecis, que es una velgüenza, que debían multal las autoridaes pol endecencia, ¡si señol!

claru que si acontinúan estus cierzus se van a recoger depriesa, sa cabarán los baños, pos al salil del agua se quea unu enteleriu.

Güeno, señol Diretoll, y pa acabal me se olviaba decile a usté que pol Santiago hay dos días torus, en la fiesta del Patronu, ques nueva ogaño y el otru, y el otru anti, y que está, sabi usté, resurtando mu bien pol estas fechas que es cuandu acúen toa la genti de juera. No pasó ná malu, a Dios gracias, más que sustus y revolconis, y la juventú bailó hasta jartarsi en lo del Retaleru, la sala e fiestas. ¡Cuántus cochis en las callis, lo tenían to cogiu! Pol fin, diga en su papel tamién esu del UHF esi, que mos lo pongan cuantu antis, pa darnus más curtura, y no mos engañin con que si hoy, que si mañana, que mos estamus jartandu, de tanta engañifa, los castúos desta tierra de la Extremaura, claru que con esu de las regionalizacionis mos jarán más casu, al tenel que atendel a un cachininu más chicu de tierra ca unu en su rigión, que no dende Madri a toos al tiempu. Ahora esu si, sin desgajarnus del troncón, comu ramaje del mismu arbo ques España, pol dondi venga la savia pa toos al tiempu. ¿Usté mentiendi? Y tamién tenemos nuestra manera de jablar, en castúo, que jablaban Pizarru, Corté y aquellus machus, y que-remus no peldeli pol no usali, y poel jablar en él, pa entendelnus entri nusotrus mejol, comu jacin los catalani y los vascuos, que son hermanus nuestrus, manque estén mu lejus, y naidi les riñi ya con la demu-eracia polque asina jablin, pos ¡qué corciu!, ca unu quieri a sus cosinas y que le ejin disfrutal dellas, sin rompé la unidá de la Nación, ni del Estao que nos ati a toos.

Güenu, pol hoy le eju. Dé mis exprisionis a los suyus y quea de usté seguru selvidoll esti que lo es

FARRUCU



Dios, el trabajo y el hombre

No fue castigo, no; que Dios quería
dignificar al hombre; que apreciara
lo que cuesta el sustento cada día
y en el trabajo la virtud hallara.

Pensamiento le dio porque ideara,
nueva aurora de luz le dió por guía,
sensible corazón para que amara,
recompensa en la paz y en la alegría.

El te dio ejemplo. El mundo fue creado
por trabajo de Dios Glorificado.
Siéntele como gozo preferente:

Vive sin mengua del trabajo honrado.
La ociosidad te llevaría al pecado
que es el veloz camino hacia la muerte.

Rufino DELGADO FERNANDEZ